



Ivano Urli nol è ancjemò avonde ricognossût pe sô impuartance leterarie e culturâl: al mertarès tante plui innomine, e forsit, se al fos dome un professôr, al sarès sustât di no vêle za otignude. Ma la impression e je che in efjets nol dedi gran di impuartance a chestis robis, che la vanitât inteletuâl no lu tocji nancje par prossim: di fat nol è dome un professôr e un scritôr, al è un mestri, cun dut il valôr che si pues cjamâ in cheste peraule. E al è un mestri vêr, che no dome al scrîf intal furlan plui perfet, salacor, che si puedi cjatâ tai tescj furlans di vuê, ma al rive a insegnâ a scrivi ancje a chei altris: miôr ancjemò, no ur insegne a scrivi, ur permet di scrivi, al rive a diliberâ la lôr fuarce creative plui sclete. Par vê une prove al baste lei cualchidune des contis e dai scrits vignûts fûr de ativitât cui siei fantats di scuele. In plui di une lenghe furlane che e je simpri intun eculibri armoniôs, scuasi magic e dal dut naturâl cul contignût, ce che al fâs di Ivano Urli un dai scritôrs plui interessants, e je la prospetive tal cjalâ il mont: il viodi lis robis in maniere semplice ma mai semplifacade, il cognossi dret il valôr de vite e dai aspjets plui vêrs e bogns dal jessi personis. In chest Urli al devente, cence fâsi inacuarzi, l'autôr di une vere rivoluzion culturâl, al rive insom e al sublime chel procès che al veve volût tacâ pre Josef Marchet cu la *Cuintristorie dal Friûl*. Se Marchet al veve tacât ribaltant la storiografie, fondade su lis bausiis dai vincidôrs, e contant une storie de bande dai furlans, ma lu veve fat daûr di categoriis avonde classichis, invezit cun Urli (e dongje di lui za cun Jacum Viole e altris) la semence gnove e cres, e fâs lidrîs che a savoltin il mont dal siôr e dal puar, che a sfidin la leç dal fuart e dal debil. La cuintristorie di Urli e lasse indaûr la impostazion dal fâ la storie di un popul, e cîr la veretât tes contis des personis, nus regale la libertât di savê la storie de int. Si scuen lei *Storie di Vera* e *Storie di Min*.

**Scrit dal Camarîr
Cjolt de Ostarie Viera**